

NAMIBIA SENIOR SECONDARY CERTIFICATE

FIRST LANGUAGE OSHINDONGA ORDINARY LEVEL 4106/1

PAPER 1 Reading and Directed Writing

2 hours 30 minutes

Marks 70

2017

Additional Materials: Answer Book

INSTRUCTIONS AND INFORMATION TO CANDIDATES

- Write your answers in the Answer Book provided.
- Write your Centre Number, Candidate Number and Name in the spaces on the Answer Book.
- Write in dark blue or black pen.
- Do not use correction fluid.
- Answer **all** questions.
- Pay attention to spelling, punctuation and sentence structure.
- The number of marks is given in brackets [] at the end of each question or part question.

OMALOMBWELO NOMAUYELELE KAALONGWA

- Nyola omayamukulo goye mEmbo lyOmayamukulo ndyoka wa pewa.
- Nyola Onomola yOsenda, Onomola yEkonakono nEdhina lyoye kEmbo lyoye lyOmayamukulo.
- Nyola nopena ombulawu nenge onduudhe.
- Ino longitha okadhimitho komeya.
- Yamukula omapulo **agehe**.
- Kotokela esipelo lyiitya, elongithonawa lyiileshitho netungo lyomatumbulo.
- Omwaalu gwiitsa ogwa gandjwa miikondekithombine [] konima yepulo kehe nenge yoshitopolwa shepulo.

This document consists of **6** printed pages and **2** blank pages.



Republic of Namibia

MINISTRY OF EDUCATION, ARTS AND CULTURE

OSHIPOOLWA A

Lesha okahokololo taka landula mpaka, e to yamukula omapulo taga ka pulwa.

Okaleshwa 1

Margaret Hilda Roberts

Margaret Hilda Roberts okwa mona etango momasiku 13 ga-Kotoba 1925. Aavali ye oyo Alferd Roberts naBeatrice Ethel. Okwa valelwa moGrantham shaLicolnshire moEngland ye omo a putukila. Oye omukiintu a tseyika a pangele ethimbo ele methimbo lyethelemumvo omilongo mbali moUnited Kingdom. He okwa li omunangeshefa omushona e na uusitola uyali wokulanditha iikulya osho wo iipumbiwa iishona yomomagumbo. Margaret okwa kala ha kwathele okupindika muusitola mbuka ngele e ya kefudho. He nande a kala i ipyakidhila nokupindika, okwa kala wo ishewe a kutha ombinga miipambe yopapolotika yoshilongo shawo, nokwa kala omusita, ye omukuluntu gwegogalo. Okwa tekulila omwana ukriste, shoka she eta Margaret a kale ha yi kongeleka yahe yedhina Finkin Street Methodist. Margaret okwa kala ha pwilikine oonkundathana dhopapolotika omanga omushona. Molweitulomo lyAlfred mopolotika oshe eta, opo a hogololwe a ninge Omukuluntu gwoshilando shedhina, Grantham.

Margaret Roberts okwa sikola osikola ye yuunona posikola yedhina Hunting Tower Road, opo a kala ti ilongo nuudhiginini nokwa pewa olupandu lwiimaliwa yoku ka tsikila kosikola yaKesteven. Margaret okwe shi pondola okumana ko oondondo dhe dhopevi. MuJanuali omumvo 1943 okwa taambelwa moshiputudhilo shopombanda shaSomerville, shoka shi li oshitopolwa shoUnivesiti yaOxford, mono a zi mo nonzapo yonkatu yopombanda moshilongwa shUunongononi. Okwa ka tsikila ishewe koshiputudhilo shopombanda shaSomerville, hoka e ki ilongela Ondjokonona osho wo iikwapolitika. Okwa hogololwa a ninge omuleli gwongundu Oxford Universiti Conservative Associaiton momumvo-1946, manga e li meilongo moshiputudhilo shopombanda shoka .

Sho a mana eilongo lye okwa ningi eindilo lyiilonga mehanganano hali ithanwa ICI, moka ye ina taambwa nande, molwaashoka oshikondo shombelewa yomayakulo goonzo dhopantu osha ndhindhilika kutya Margareth omukiintu gwoondunge odhindji noya li ye na uumbanda okulonga nomuntu guukwatya wa tya ngaaka. Margaret okwa yi mongundu hayi ithanwa Local Conservative Association nokwa gongala moshigongi shongundu oyo tuu ndjoka muLandudno. Aanambelelwa yehanganano ndyoka oya li ya kuthwa koshipundi keholokepo lye noye mu pula a ninge omuulikwahogololwa gwongundu yedhina Conservative.

Margaret a wayuka mo momusholondondo gwaahogololwa. Ethimbo ndyoka ti ilongekidhile okuya momathigathano gomahogololo, okwa tembukile koDartford, hoka a ka ninga omapekapeko muunongononi wokupungula o-ice cream uulethembo wontumba.

MuNovomba omumvo 1950 Margaret, okwa kutha ombinga ongomuulikwahogololwa gwongundu yoConservative moDartford. Ongundu ye oya li ye mu inekela, shaashi okwa li endenda osho wo enyakwa mokupopya nonge okwa tameke okupopya oto hala u tye kaku na ngu ha popi e mu vule. Oshinenenima osho shika kutya oye awike a li omukiintu mongundu ayihe yaaulikwahogololwa. Pethimbo lyiikonga yomahogololo okwa li ta yambidhidhwa kaakuluntu ye, osho wo komuyaleki gwe Dennis Thatcher, ngoka ya ka hokana naye muDesemba omumvo 1951. Mondjokana yawo oya pewa aakwanambwiyu, omukwati gwomafuma nomutsi gwiikwiila. Omadhina gawo Carol naMark. Iilonga shilindi manga, Margaret a ningi omusilishimpwiyu gwiimputu.

Momumvo 1959 okwa hawahwameke oshigwana a tula ombunda moshihwa nokwe shi pondola okumona iititatu iyali yaahogololi. Okwa mono oshipundi momutumba gwopashigwana a kalele po Finchley. Momumvo 1960 okwa pewa ooposa yuuhamushanga wopevi mUuministeli wOpenzela nOmakwashilipaleko gOpashigwana, molwuupenda wokupopya kwe, ndjoka inaayi pewa nande onale omukiintu. Margaret okwa ulikwa a ninge oshilyo shoKabinete momumvo 1966.

Omukalelipo gwiigwana yaHangana okwa ulike Margaret momumvo 1967, opo a kuthe ombinga metalelepo lyopauyuni, ndyoka lya li na sha nomalandulathano gokulela. Omukalelipo gwiigwana yaHangana muLondon, okwa gandja olopota kombinga yetalelopo, moka a popi kutya Margaret ota vulu okuninga Omuprima Minista monakuyiwa. Momumvo 1970 ongundu yopapolotika yaConservative oya sindana ishewe momahogololo, moka Margaret a ulikwa kokabinete a ninge Amushanga gwElongo nUunongononi. Uupenda nondjungu ye, oyo ye mu lukitha oshilukadhina komutoolinkundana gwaSoviet kutya ye “Iron lady” tashi ti; omukiintu gwoshikushu.

Margaret okwa ningi Omuprima Minista gwaBritain momumvo 1979. Margaret oye omukiintu gwotango mondjokonona yaBritain a mona oshipundi shoka shuuleli wopombanda. Melelo lye okwa eta mo omalunduluko ogendji ngaashi, omwaalu gwaambo yaa na iilonga ogwa shuna pevi lye neliko lyoshilongo olya yi nawa pombanda. Nande a kala noku shi enditha nawa melelo lye, onkene ngaa pwa kala pe na mboka ye li ompinge naye tashi holoka sho a li a ningilwa onkambadhala yedhipago lyoshiyakela mo-12 gaAguste 1984, pethimbo a li mohotela yontumba, moka a zi nokapulu kelume.

Oshilongo shika sho tashi putuka, omashongo melelo nago otaga indjipala. Margaret okwa kala ta nana nuudhigu melelo lye, unene tuu sho oshilyo she oshikulu shoKabinete, sho osho sha li omupevi gwe sha tokola okuthiga po iilonga. Momumvo 1990, Margaret okwa pingewa po kuJonh Major ongOmuprima Minista, osho wo omuleli gwongundu. Margaret kwa thigi po iilonga yopapolotika momumvo 1992, netompelo kutya ota ka kala a mangeluka okupopya omadhiladhilo ge.

Oomvula sho tadhi ende tadhi yi nuukolele olundji otau nyangwanyangwa, Margaret a nkundipala, nomomasiku 13 gaNovemba 2013 okwa zimbuka molweendo lwe lwokombanda yeivi.

1 Mokuyamukula epulo **1 (a)** sigo **1 (c)**, owa pumbwa ashike okunyola ondanda **A, B, C** nenge **D**, ndjoka yil li peyamukulo lyomondjila. Ngaashi **(a) A**.

(a) Pethimbo lyefudho Margaret okwa kala...

- A** ha yi kongeleka kehe Osoondaha.
- B** ha kutha ombinga miipambeke yopapolotika.
- C** ha kwathele mombelewa yomukuluntu gwoshilando.
- D** ha kwathele he okulanditha muusitola we.

[1]

(b) Onzapo yotango yomoshiputudhilo shopombanda yaMargaret oyoshilongwa shinipo?

- A** oshlikwapolotika
- B** oshOmapekapeko
- C** oshOndjokonona
- D** oshUunongononi

[1]

- (c) Edhina lyomwana gumwe gwaMargaret olye?
A Alfred
B Dennis
C Mark
D John [1]
- (d) Pamadhiladhilo goye, omolwashike ongundu yedhina Conservative ya pula Margaret, opo a ninge omuulikwahogololo gwongundu yawo? Shi koleka. [2]
- (e) Omushangi okwa hala oku tu lombwela shike kombinga yonkalamwenyo yaMargaret? Shi holola niitsa **itatu**. [3]
- (f) Uumbangi unipo tawu ulike kutya Margaret okwa li omupopi ha nyanyudha mokaleshwa haka? Shi koleka. [2]
- [10]

- 2 Owa kutha ombinga momathigathano gomahogololo wu ninge omukalelipo gwaanasi kola mosikola yeni. Longekidha nduno oshipopiwa shoye, u yelithile aanasi kola ooyakweni shoka to ka ninga ngele ye ku hogolola.

litya nayi kale **200 – 250**. [20]

OSHIPOPOLWA B

Lesha okahokololo taka landula mpaka, e to yamukula omapulo taga ka pulwa.

Okaleshwa 2

Indira Gandhi

Indira Gandhi oye gumwe gwomaakiintu ya tseyika nawa methimbo lyethelemumwo etimilongombali. Oye omukiintu gwotango a ningi Omuprima Minista gwaIndia a lele uule wiikako itatu ya landulathana okuza 1966 sigo 1977 noshikako oshitine okwe shi lele okuza 1980 - 1984. Indira omwanakadhona gwOmuprima Minista omukulu gwaIndia, Jawaharlal Nehru a valwa momasiku 19 Novemba 1917 moAlahabad. Okwa valwa pethimbo lyekondjelomanguluko lyaIndia okuza muukoloni wAabritina. He yaIndira nahekulu, oyo ya li ya kwatela komeho ekondjelomanguluko lyaIndia. Indira nande ka li naanaa i itula miikwapolotika onkene tuu epangelo lyaBritain lye mu tula mondholongo, shoka she mu tula monkalo yuupongo.

Aakuluntu ye oya kala inaya hala oku mu tuma koosikola dhAabritana ndho dha kala muIndia, onkene okwa kala ashike ha sikola moosikola dhAaIndia ye ha kongelwa nee aalongi yopaumwene haye mu longele megumbo. okwe shi pondola ngaa okupita omatrika ge momumvo 1934 nokwa ka tsikila eilongo, lye moshiputudhilo shopombanda shaViswa Bharati. Omanga i ipyakidhila neilongo yina okwa kwatwa kuunkundi nosha eta Indira a thige po eilongo lye a ka yakule yina koEuropa, hoka a li ta mono epango. KoEuropa okwa taambelwa moshiputudhilo shopombanda shaSomerville oshiputudhilo shopombanda shaOxford, moka e ki ilongela Ondjokonona osho wo likwapolotika.

Indira Gandhi okwa yalekwa komuholike gwe gwOmufransa gwedhina Feroze Gandhi, ashike aavali kaya li ye shi nyanyukilwa noya li taye shi kandeki, molwaashoka Feroze, aniwa okwa za mezimo lya hepa, ye eitaalo lye olya yooloka kwaandi lyAahindu. Konima aavali oya ka zimina ngaa e taa hokana. Oya hokana momumvo 1942. Mondjokana yawo oya yambekwa nomagano gaamati yaali, omadhina gawo Rajiv naSonja. Konima ashike yondjokana yawo Feroze opamwe nomufuko gwe oya edhililwa molwiinyangadhalwa yopashigwana. Indira okwa kala oshikaha shokolululo lwahe omanga he e li Omuprima Minista gwaIndia. Momumvo 1950, Indira okwa ningi omupresidente gwongundu yopapolotika yedhina "India National Congress" nokwa mono ompito yokuninga oshilyo shomutumba gwopashigwana momumvo 1964. Eso lyomusamane gwe osho wo lyahe, olya etitha Indira a shune omutse miipeta miikwapolotika, opo a kale i ipyakidhila naakwanegumbo lye.

Konima yeso lyaJawaharlal Mehru , Lal Bahadur Shastri oye a ningi Omuprima Minista gwaIndia, nokwa pangela uule woomvula mbali. Indira Gandhi okwa ningi Ominista yOmauyelele nOmaandjaganeko mepangelo lyaBahadur nokwa ka ulikwa a ninge omuulikwahogololwa gwongundu oyo tuu ndjoka, konima yeso lyaLal Bahadur Shatri. Euliko lyaIndira okuninga omuulikwahogololwa gwongundu, okwa li lya patanekwa koshilyo oshikulu shongundu Morarji Desai, shoka sha eta omutumba omunene gwiilyopitithi yongundu gu topoke moongundu mbali. Ongundu yimwe oya kwatelwa komeho kuIndira nonkwawo okuMorarji Desai. Momumvo 1966 omo Indira a hogololwa a ninge Omuprima Minista. Melelo lye okwa ulike owino ye miikwapolotika, naIndira okwa ningi oshitopolwa oshinankondo muumbugantu waAsia. Okwe eta mo omalunduluko omanene nokwa simana ngaashi, miikwaliko nomomilandu dhopashigwana. Oombanga okwe dhi ningi dhoshigwana oku dhi kutha meliko lyopaumwene nosha eta iiyimati iiwanawa meliko lyoshilongo, shaashi iitayi-mbaanga oya londa okuza 8200 sigo 62000. Omapungulo gopamangeshefelo oga yi pombanda osho wo uunamapya owe eta elunduluko ndyoka itaali dhimbiwa momauyuni tage ke ya. India okwa vulu okwiilongela iilikolomwa ye ndele hakupewa owala okuza kondje yiilongo.

Omahogololo gomumvo 1977 ongundu yompilameno yedhina Janta yi li mewiliko lyaMorarji Desai, oyo ya sindana omahogololo. Epangelo kalya li tali yi komeho nawa kohi yeledo lye. Eliko lyoshilongo olya gu pevi nayi, ndele ombelewa te yi thigi po. Omahogololo oga tseyithwa momumvo 1980, Indira Gandhi oye a sindana omahogololo omumvo ngoka. Oomwedhi dhe dhopetameko okwa li i ipyakidhila nokupotokonona iikumungu yopolotika moshilando shaPundjab, moka mwa li mu na ehala eyapuki lyomaiyongameno gomuhoko gwaAavasikhs gwedhina "Golden Temple". Aasindumbo nepangelo, oya li ya yungu oontanda dhiita mehala moka. Indira okwa longitha oonkondo dhe dhopaleli nokwa tumu omatanga gaakwiita, opo ga ka tidhe mo aatsindumbo nepangelo mehala moka. Aakwiita yaIndia oya sindana okukutha ko ehala, ashike omwa sila aakwashigwana oyendji unene tuu Aavasikhs. Mo - 31 Kotoba 1984 omanga Indira Gandhi te ende moshikunino shepangelo muNew Delhi okwa yahwa okusa kaatonateli ye yaali yomuhoko gwAavasikhs. O-Iron lady yaIndia ya sile kondjoko noya thigi aakwashigwana yaIndia taya tyapula iiyimati yeledo lye.

- 3 Muuleshwa mbuka uyali wa lesa, gandja omafaathano kombinga yondjokonona yopapolotika yaaleli aakiintu ya hokololwa mo. **[20]**
- 4 Owa lesa uuhokololo tau popi kombinga yonkalamwenyo yaakulukadhi mbaka yaali Margaret Thatcher naIndira Ghandi muunyuni. Shangela kuume/kahewa koye ombilive, nkene omahokololo gaakulukadhi mbaka ge ku guma komwenyo. Shi ninga niitya **200 – 250.** **[20]**

BLANK PAGE

BLANK PAGE